

Regional News Unit AIR Aizawl  
Saturday, January 18, 2025

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- ZORO leh MZP chuan Zofa ram hrang hranga chengte zalen taka in tlawh pawh theihna Free Movement Regime (FMR) thiah chu an duh loh thu an sawi.
- 38th National Games tun thla ni 28 atanga February ni 14 chhunga Uttrakhand a neih tur ah Mizoram atangin infiammi 81 an tel thei tura ngaih a ni.
- Parliament Budget session chu tun thla ni 31 ah tan a ni dawn.
- Prime Minister Narendra Modi'an naktuk Pathianni chawhma dar 11 hian 'Mann Ki Baat' programme a hmang leh dawn.

<><><>

### ZORO

Zo Re-Unification Organisation (ZORO) chuan Zofa ram hrang hranga chengte zalen taka in tlawh pawh theihna Free Movement Regime (FMR) thiah chu an duh loh thu sawiin na taka zo zui an tum an ti a,

Nimin khan General Headquarters President Pu R. Sangkawia, kaihhruaiin ZORO pisa-ah an pawl an inhmukhawm a, India-Myanmar ramri kan turte tan Border Pass neih ngei a tul leh Border Pass neilo tan ramri kan a theih lohna dan kumin January 1 atanga ken kawh tan chu an duhloh thu sawiin FMR kengkawh tura tihna Sorkar laipui order leh Mizoram Sorkar order chu ni tun thla tawp hian a hal dawn a, Sorkar laipui leh Mizoram sorkar order hi Aizawl mai bakah Mizoram hmun hrang hranga hal turin ruahmanna an siam tih an sawi a ni.

Mizo Zirlai Pawl MZP General Headquarters Executive Committee meeting nimina MZP Conference Hall-a neih chuan Zofa chhak leh thlanga cheng, u leh nau, hnam leh sakhua thuhmun, awlsam taka inkalpawhna kawngpui pawimawh tak khar a ni ta hian Zofate inpumkhatna turah nghawng tha lo tak a neih a hlau an ti a. Tun hnaia Myanmar, Bangladesh leh Manipur buaina avanga Mizorama sa himna zawnga lo tlan unaute theih ang angin Mizoram-in a tuamhlawm mek laia Bangladesh atanga Mizorama sa himna zawnga lo lut mi 28 velte thawn let an ni chu an lainat hle an ti a. Bangladesh atanga dan loa lo pem lut Chakma mi sing tel an en liam mai mai laia, Zofate laka India sawrkar laipui hmalak dan chu na an tih thu Union Home Ministry-ah lehkha thawn nise an ti.

<><><>

## HUMAN PAPILLOMA VIRUS VACCINE

Human Papilloma Virus Vaccine, HPV Vaccine tia lam tawi, cancer laka invenna chu reilote ah Mizoram ah hman tan tura beisei a ni.

Directorate of Health Services hnuaiia Jt. Director, Extended Programme on Immunization EPI leh State Immunization Officer Dr. Lalmuanawma Jongte chuan Akashvani Correspondent nen an inkawmna ah he thu hi sawiin HPV vaccine chu hmeichhe chhul hmawr cancer danna tura tih a ni a ti a, hmeichhe naupang leh fleirawl kum 9 atanga kum 14 inkar tan sorkar chuan a thlawnin vaccine a pe dawn tih a sawi.

Dr Lalmuanawma Jongte chuan Mizorama school hrang hrang leh school kal lo ah naupang hming khawn khawm niin mi 75,000 vel hming lakkhawm tawh a ni a ti a, Ministry lamah an hming theh luh a ni tih sawiin hei hi single dose a pek tur a ni dawn a ti a, Mamawh dan a zirin ralhlante huam an nih tur thu a sawi bawh.

State Immunization Officer chuan HPV hri danna pe thei tur chuan India ram state thlanchhuah zingah Mizoram chu a tel a ti a, HPV cancer chu mipa aiin hmeichhia ah a tam zawk avangin Mizoram sorkar chuan hmeichhe naupangte a pe rih phawt dawn tih a sawi bawh.

<><><>

## AIZAWL CRIME

Aizawl District Police DEF hnuaiia Police Station hrang hrangah nikum chhungin thubuai 1460 ziahluh a ni a, Aizawl Police Station-ah thubuai ziahluh tam ber niin thubuai 489 ziahluh a ni.

Aizawl District Crime Review Meeting SP, Aizawl pisa ah Pu Rex Zarzoliana Vanchhawng kaihhruaia neih ah hemi chungchang hi tarlan niin Thubuai ziahluh zawng zawng atang hian Case 712 (za zela 48.77%) chu chhui chhuah niin Chargesheet tawh a ni a, chhui mek case 404 a awm a ni.

Aizawl SP Pu Rev Zarzoliana Vanchhawng chuan kal khawmte chu mahni hna leh mawhphurhna tha taka hlen tur leh dan leh thupekte kenkawh kawngah taima taka hma la chhunzawm zel turin a chah a, he hunah hian Aizawl District chhunga Sub - Divisional Officer (SDPO), DySP (Prosecution) leh Aizawl khawpui chhunga Police Station hrang hranga Officer-in-charge te an tel a ni.

<><><>

## NATIONAL GAMES

Ramchhunga infiamna khawmpui lian ber, 38th National Games, 2025, chu January ni 28 atanga February ni 14 chhung khian Uttrakhand ah neih tur a ni a, inbuatsaihna ngawrh taka kalpui mek a ni a, Mizoram atangin Sports discipline 14 chu National Games khel turin an tling a, infiammi 81 an tel thei tura ngaih a ni.

National Games-a Mizoram aiawha tel tur Sports Association hrang hranga coach te chu Mizoram Olympic Association chuan nimin khan Sports & Youth Services Conference Hall ah a kokhawm a, National Games inbuatsaihna hrang hrang sawiho a ni.

*National Games 2025, Uttarakhand a neih turah hian Dehradun khawpuiah infiamna tam zawk chu nghah a ni dawn a. Infiamna hrang hrang 34 hmanga inelna neih tur a ni a, Mizo infiammi langsar zingah Lalremsiami Hockey player chu Mizoram atanga tel thei tur langsar zingah a tel a. Medal beisei awm zingah Nazareth Lathazuala, Wushu, Taekwondo poomse mipa team leh Lalthlamuanpuia, Weightlifting ah Lalchhanhimi te chu medal hlawhchhuak thei tur zingah beisei an ni.*

*Mizoram atanga National Games tel thei tur Sports discipline te hi - Wrestling, Football, Weightlifting, Wushu, Boxing, Cycling, Aquatic, Hockey, Judo, Archery leh Taekwondo te an ni a, Wild card hmanga tel thei turte hi - Swiming, Shooting leh Athletics te an ni. Kum 2025 National Games hi Mizoram atanga national games tling thei an tam ber tum a ni.*

<><><>

## MSCPCR

Mizoram State Commission for Protection of Child Rights (MSCPCR) hnuaiiah Nikum January atanga August ni 31 inkarah naupang kum tling lo laka hleilenna thleng report 210 ziah luh a ni.

Mizoram State Commssion for Protection of Child Rights ChairPerson Pu Jimmy Laltnanmawia'n Akashvani Aizawl News a hrilh danin, Mizoram district 5 atanga naupang kum tling lo laka hleilenna thleng report lut chu 210 a ni a ti a, Aizawl district-ah 139, Lunglei district-ah 12, Champhai district-ah 14, Kolasib district-ah 19 leh Siaha district-ah 26 te an ni tih a sawi.

Pu Jimmy Laltnanmawia chuan tunlaiiah Social Media Platform hrang hranga naupang te nihna tarlan ching an awm thu leh heihi POCSO dan kalh a nih avanga mipuite fimkhur a ngaih thu sawiin hetiang kawnga dan pal zut te chu thla 6 chhung lung in tan bakah pawisa fai cheng nuai 2 thleng chawitir theih an nih thu leh tun hnaiah youtuber 5 leh facebook hmangtu 2 lakah dan ang a hma an lak thu a sawi bawk.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

## PARLIAMENT BUDGET SESSION

Parliament Budget session chu tun thla ni 31 ah tan a ni dawn. President Droupadi Murmu-i chuan session tanni January ni 31 hian Lok Sabha leh Rajya Sabha member thukhawm hmaah thu a sawi dawng a.

Union Budget chu February ni 1 ah pharh a ni ang. Parliament Budget session hi thawh hniha neih tur a ni a, a thawhkhatna hi January ni 31 atanga Febraury ni 13 thleng neih a ni ang a, a thawh hnihna hi March ni 10 atanga April ni 4 chhungin neih leh a ni ang.

<><><>

#### CCEA

Union Cabinet Committee on Economic Affairs, CCEA chuan Rahtriya Ispat Nigam Limited (RINL) dinthar leh nan cheng vaibelchhe singkhat sang 1 leh 440 hman a remti. Union Information and Broadcasting Minister Ashwini Vaishnaw chuan New Delhi-ah he thutlukna chungchang hi chanchinbumite hmaa sawiin Union Cabinet chuan RINL dinthar lehna tur sum hi pek remtih a ni a ti a. RINL chu Andhra Pradesh-a inbun niin ramchhunga steel company pawimawh tak a ni a ti a. Hetianga dinthar leh remtih anih avang hian he company-a thawk zawng zawngte bakah a kaihnawih sum khawihute tan hlawkna tam tak a thlen dawn a ni a ti.

<><><>

#### DELHI ASSEMBLY

Member 70 awmna Delhi Assembly inthlan atana nomination thehluh hun chu nimin khan a tawp a. Mi sang khat chuangan inthlan chuh tumin nomination an thehluh a. Nimin a tawp ni ah khan BJP hruaitu Shikha Rai leh Neeraj Basaya te chuan hming an pe lut a. Aam Aadmi Party atangin Awadh Ojha, Rakhi Bidlan leh Bandana Kumari ten hming an pe lut bawk a ni. Inhnukdawd duh tan kaleh Thawhtanni thleng hun hawn a ni.

<><><>

#### PM MANN KI BAAT

Prime Minister Narendra Modi chuan tun thla ni 19 chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 118-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>